

conçejo de Lorca et porque el alcaçar et la villa sea mejor guardado pora mio seruïço, do et otorgo et conffirmoles que ayan pora las lauores de las torres et de los adarues del alcaçar et de la villa todas quantas rentas yo y en Lorca por qualquier manera que yo las ouiesse de auer, assi commo las ouieron fata aqui et vsaron dellas. Ende mando et deffiendo firmemente al adelantado o adelantados, o merino o merinos, o almoxeriff o almoxeriffes, o otros qualesquier que ouiessem a ueer la tierra por mi por qualquier manera, que ninguno non sea osado de les yr [con]tra esto nin de les enbargar ninguna cosa dello por ninguna manera, ca mi voluntat es de les fazer esta merçet porque es mucho mio seruïço et pro et guarda de toda la tierra, sinon qualquier que lo fiziesse auria la mi yra et demas pecharme y a en pena mill marauedis de la buena moneda por quanto danno me ende veniesse por esta razon. Et porque esto sea firme et estable mandeles ende dar esta carta seellada con mio seello de çera colgado.

Dada en Buytrago, veynte dias de março, era de mill et CCC et quarenta et tres annos. Yo Johan Sanchez la fiz escriuir por mandado del rey. Sancho Martinez. Alffonso Diaz, Alffonso Ferrandez.

XLIII

1305-III-20, Buitrago.—Al concejo de Lorca. Libertad para la exportación de sus productos. (A.M.L., perg. 31).

Sean quantos esta carta vieren commo nos, don Ferrando, por la gracia de Dios rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Molina, por fazer bien et merçet al conçejo de Lorca doles et otorgoles que ellos que puedan sacar por mar et por tierra cada que ellos quisieren de los sus bienes pan et vino et figos et azeyte et miel et otros frutos qualesquier et todas las otras mercadurias pagando mios derechos en aquellos logares do los [usa] van pagar, et non leuandolo a la tierra de los mios enemigos [yo] les otorgo en quanto la mi merçet fuere. Porque mando a los adelantados et merinos que agora y son et seran daqui adelante o a otros qualesquier que tengan la tierra por mi o la ouissen a ueer [que ninguno non sea] ossado de les enbargar nin de les contrallar por ninguna manera contra esta merçed que les yo fago, ca qualquier que lo feziesse pesarme y a ende et pecharme y a en pena mill morauedis de la moneda nueva et aquel que contrallasen todo el danno que por ende recibiesse doblado. Et porque esto sea firme mandeles ende dar esta carta seellada con mio seello de çera colgado.

Dada en Buytrago, veynte dias de março, era de mill et CCC, et quarenta et tres annos. Yo Johan Sanchez la fiz escriuir por mandato del rey. Sancho Martinez, Alffonso Diaz, Alffonso Ferrandez.

